


“Alina, Carnavalista di Cuna y Curazon”

Diabierna awor, Alina, Queen Champagne Carnaval Group lo cautiva Aruba cu “The Flower of the Dragon”



ORANJESTAD - E representante di Champagne Carnaval Group, pa locual ta trata eleccion di Reina Grandi di Aruba su di 55 Carnaval, Alina Mansur ta un carnavalista di infancia. Semper Alina a sa di forma parti di paradanan y actividadnan Carnavalesco. Esaki mirando cu e ta goza di raiznan firme den Aruba su historia di Carnaval.

Constantemente por admira Alina ta goza cu e comunidad Carnavalesco den paradanan. Na 2005 Alina a sa di participa na eleccion di Reina Juvenil di nos Carnaval, esaki debi na su gran amor y pasion pa e Carnaval di Aruba. Alina kier forma parti di e celebracion carnavalesco mas grandi di nos region....E Carnaval di Aruba! Un hoben ehemplar, cu di jong a forma parti di gruponan di baile y ta campeona “Amazona” di Aruba y a sa di representa Aruba cu hopi orguyo na nivel internacional y trece titulonnan importante pa nos pais. Alina tin 17 aña di edad y ta un alumna den su ultimo aña escolar na International School of Aruba .



“The Flower of the Dragon”

Diabierna dia 6 di Februari e tema di Alina lo ta uno sumamente encantador. Na lehamo Oriente ta conta un storia di lucha pa libertad y igualdad pa tur ser humano. E leyenda di “Flower of the Dragon” ta conta e aventuranan di un princess cu ta fascina e dragon cu su beyeza y encantonan. Baile, literatura, poesia, canto, y teatro ta e armanan di e “Flower of the Dragon”.

Alina lo transforma Aruba Entertainment Center den un celebracion magico di “Flower of the Dragon”.

For di su entrada, durante presentacion in-oficial, te ora e presenta den forma oficial por nota cu Alina ta trece su tema dilanti na tur momento. Alina ta invita un y tur pa goza di su presentacion cual e ta realiza cu hopi amor pa e publico Carnavalesco y pa Aruba henter. E ta hasi un yamada nacional pa nos apoya y aplaudi e trabao duro y balioso di S.A.C. kendenan semper a sa di tin e bienestar di Carnaval di Aruba na promer lugar.

